

# Scrittori Di A Storia

I so versi sò zitelli  
Chi correnu acelli  
In li chjassi.

In un sognu d'armunia  
Macineghjanu a magia  
Di so passi.

È so voce sò staffile  
Chi chjoccanu allegrie  
In li venti.

A la notte bughjicosa  
Facenu trimà l'ascosa  
À lumi spenti.

In la salla chì si tace  
Corre un soffiu di pace  
E canzone.

A noi tutti sò offerte  
Dà quelli chì volenu sparte  
L'emuzione.

Elli sò tanti guerrieri  
Di a lingua è sò fieri  
Di e rime.

Quand'ella sciappitteghja  
O ch'ella spampiluleghja  
A l'infine.

A l'omu chì s'ammulisce,  
A u populu chì si dice  
Senza avvene.

Ricordanu a speranza

D'una terra fratellenza,  
À vene.

Cantanu a nazione  
In core imaginazione,  
Mai in vanu.

Sò scrittori di a storia  
Mà senza sete di gloria  
Di l'umanu.

A puesia ùn hà sensu  
Chì girà cum'è lu ventu  
Sempr'in tondu.

In una sola canzona  
Sò e mille rivuluzione  
Di u mondu.